



WIZARA YA HABARI, MAWASILIANO NA TEKNOLOJIA YA HABARI

JARIDA

LA HABARI NA MAWASILIANO



Toleo la 23 Aprili, 2022

BODI YA WAHARIRI

Mwenyekiti

Dkt. Jim Yonazi

Katibu Mkuu wa Habari, Mawasiliano na
Teknolojia ya Habari

Mratibu na Mhariri wa Jarida

Faraja Mpina

Waandishi wa Jarida

Faraja Mpina

Wapiga Picha

Jumaa Wange

Yona Meshack

Msanifu wa Jarida

Janeth Peter



WAZIRI NAPE AANZA ZIARA KUKAGUA MWENENDO WA OPERESHENI ANWANI ZA MAKAZI

Waziri wa Habari, Mawasiliano na Teknolojia ya Habari, Mhe. Nape Nnauye leo ameanza ziara ya kukagua na kuhamasisha utekelezaji wa Operesheni ya Anwani za Makazi katika mikoa ya Tanga, Kilimanjaro na Arusha

Akizungumza na waandishi wa habari kabla ya kuanza ziara hiyo jijini Dodoma, Waziri Nape amesema tathmini inaonesha utekelezaji wa operesheni hiyo ni asilimia 69 huku baadhi ya maeneo yakiwa na changamoto na kutofanya vizuri akiitaja kwa mfano mikoa ya Tanga na Dar es Salaam.

"Kwa muda uliobaki tumekubaliana tuongeze nguvu kwa kutoka ofisini na kuifikia mikoa yote nchinzimaili kukagua na kuhamasisha utekelezaji wa operesheni ya Mfumo wa Anwani za Makazi unaojumuisha ukusanyaji wa taarifa, kuweka taarifa kwenye mfumo wa kidijitali na uwekaji wa namba za nyumba, majina ya barabara na mitaa", Amezungumza Waziri Nape.



Ameongeza kuwa, Operesheni ya anwani za makazi inalenga kuhakikisha kila mtanzania anatambulika mahali alipo, mahali anapofanyia kazi/biashara na anapoishi hivyo ushirikiano wa pamoja utaifanya nchi ya Tanzania kuwa mionganoni mwa nchi ambazo unaweza kupata huduma ukiwa nyumbani kwako

"Katika mazingira haya ya dunia inayokwenda kidigitali si vema kwa nchi kuachwa nyuma, tumuunge mkono Mhe. Rais Samia kwenye operesheni hii na tujitendee haki watanzania kwa kuhakikisha tunakuwa na Anwani za Makazi", amesisitiza Waziri huyo

Aidha, katika ziara hiyo Waziri Nape ameambatana na Dkt. Jim Yonazi, Katibu Mkuu wa Wizara hiyo pamoja na baadhi ya wataalamu ambapo wanatumia usafiri wa helkopta ili kuifikia mikoa zaidi ya mitatu kwa siku, kwa kuwa zoezi hilo ni operesheni maalumu na Wizara imejipanga kwenda kuona mwenendo wa utekelezaji na kuongeza nguvu maeneo yenye Changamoto.



WANAOKWAMISHA OPERESHENI YA ANWANI ZA MAKAZI KUCHUKULIWA HATUA



Waziri wa Habari, Mawasiliano na Teknolojia ya Habari, Mhe. Nape Nnauye amemuelekeza Mkuu wa Mkoa wa Tanga, Adam Malima kuhakikisha anawachukulia hatua wale watakao bainika kukwamisha utekelezaji wa Operesheni ya Anwani za Makazi katika Mkoa huo

Akizungumza leo Jumatatu tarehe 11 Aprili, 2022 jijini Tanga wakati wa ziara yake ya kukagua mwenendo wa utekelezaji wa Operesheni ya Anwani za Makazi, Waziri Nape ameonesha kutokuridhishwa na kasi ya utekelezaji katika Mkoa huo unaoshika nafasi ya pili kutoka mwisho

"Hili la Operesheni ya Anwani za Makazi ni jambo letu sote, tuone shida ya kuwa mkiani, wanaotukwamisha washughulikiwe na kama kuna shida kwenye utekelezaji tuelezane tutatue kwa pamoja", Amezungumza Waziri huyo

Waziri Nape amesitiza kuwa uwekaji wa Anwani za Makazi sio zoezi la kawaida ni operesheni maalum iliyotangazwa na Rais, ambapo kukamilika kwake kutarahisisha kufanyika kwa sensa ya watu na makazi na ufikishaji wa huduma mbalimbali za kijamii na kiuchumi

Naye Mkuu wa Mkoa wa Tanga, Mhe. Adam Malima amekiri utekelezaji wa Operesheni hiyo bado haujaanza katika halmashauri tatu za Mkoa huo, ambazo ni halmashauri ya Korogwe mji, Korogwe vijijini na Kilindi kutokana na changamoto za kiutendaji

Kwa upande wa Katibu Mkuu wa Wizara ya Habari, Mawasiliano na Teknolojia ya Habari Dkt. Jim Yonazi amesema kuwa Mfumo wa kielektoniki unaoingiza taarifa za wakazi na makazi unafanya kazi vizuri, na Wizara hiyo ipo tayari kutoa wataalamu kwenda kuongeza nguvu kwenye mkoa au halmashauri yeyote ambayo ina uhitaji.





TARURA, TANROAD WAKUMBUSHWA KUWEKA MAJINA YA BARABARA ILI KURAHISISHA OPERESHENI ANWANI ZA MAKAZI

Waziri wa Habari, Mawasiliano na Teknolojia ya Habari, Mhe. Nape Nauye amezikumbusha taasisi za TANROAD na TARURA kuweka majina ya barabara ili kurahisisha Operesheni ya Anwani za Makazi

Akizungumza wakati wa ziara ya kukagua mwenendo wa utekelezaji wa Operesheni hiyo Mkoani Kilimanjaro, Waziri Nape amesisitiza kuwa iko hatari ya ukiritimba unaoweza kufanywa na baadhi ya watu kwa kuijita majina ya mitaa yote na barabara kwa kigezo cha kuchangia fedha za utekelezaji wa zoezi la uwekeji wa Anwani za Makazi.

"Haya ni maelekezo yaliyotolewa na Waziri Mkuu kwamba TANROAD na TARURA kwasababu barabara zote ni za kwao wahakikishe wanaweka majinayahizibarabarailiisaidie kasiyakukamilisha zoezi hili na mie naomba niwakumbushe

watekeleze maelekezo kwa kuweka majina ya hizi barabara ili kuzipunguzia mzigoto halashauri na kuongeza kasi ya utekelezaji wa operesheni ." Amesema Waziri huyo

Ameongeza kuwa, viongozi na wananchi wanatakiwa kuwa makini katika kuweka majina ya mitaa kwa kuwa kuna wadau wanajitolea, wanachangia fedha zao lakini ni vizuri majina yawe yenye uzalendo na yanayoendana na uhalisia wa nchi yetu yakiwemo majina ya viongozi pamoja na watu mashuhuri.

Katika hatua nyingine, Waziri Nape ameonesha kuridhishwa na kasi ya utekelezaji wa operesheni hiyo katika Mkoa wa Kilimanjaro ambapo utekelezaji wake umefikia asilimia 99.1.

RC MONGELLA APONGEZA KWA UBUNIFU ANWANI ZA MAKAZI, MFUMO WA NaPA KUONGOZA WATALII

Waziri wa Habari, Mawasiliano na Teknolojia ya Habari, Mhe. Nape Nnauye (Mb) ameupongeza Mkoa wa Arusha chini ya uongozi wa Mhe. John Mongella, Mkuu wa Mkoa wa Arusha, kwa ubunifu wa kuanzisha karakana yenye uwezo wa kuzalisha nguzo 100 za majina ya barabara na mitaa kwa siku moja na ambazo zitarahisisha uwekaji wa miundombinu hiyo ya Mfumo wa Anwani za Makazi mkoani hapo.

Akiwa katika Mkoa wa Arusha leo tarehe 12 Aprili, 2022 Waziri Nape amefanikiwa kukagua miundombinu ya Anwani za Makazi, kupokea taarifa ya utekelezaji wa operesheni ya Mfumo wa Anwani za Makazi pamoja na kutembelea karakana hiyo iliyopo katika kata ya Kaloleni wilaya ya Arusha.

“Niwapongeze kwa kuanzisha karakana yenu wenyewe, huu ni ubunifu mkubwa na pia ni fursa na inapunguza gharama za utekelezaji wa operesheni ya mfumo wa Anwani za Makazi”, Amezungumza Nape

Aidha, amezungumzia faida za Mfumo wa Anwani za Makazi ambapo kwa Mkoa wa Arusha utasaidia kuongoza watalii kutoka sehemu moja hadi nyingine kwa kutumia programu tumizi ya Mfumo huo (NaPA) ambao utasaidia sana watalii kwa kuwa wataweza kuwasiliana na mfumo kuwapeleka mahali wanapotaka.



Ameongeza kuwa, "Tunaposema Mfumo wa Anwani za Makazi unaenda kuboresha ufikishaji wa huduma tunamaanisha tunaenda kuingiza nchi ya Tanzania kwenye nchi zenye ustaarabu zinazohudumia wananchi wake pamoja na wageni kistaarabu".

Katika hatua nyingine Waziri Nape amewaomba viongozi wa dini mbalimbali kumuunga mkono Mhe. Rais katika operesheni hii kwa kutoa elimu kwa waumini wao juu ya manufaa, umuhimu na fursa zinazopatikana kupitia Mfumo wa Anwani za Makazi

Kwa upande wa Mkuu wa Mkoa wa Arusha, Mhe. John Mongella amesema Mhe. Rais wa Jamhuri ya Muungano wa Tanzania ameshaelekeza zoezi hili kukamilika ifikapo 22 Mei, mwaka huu lakini kwa mkoa wa Arusha wamejipanga kukamilisha ifikapo tarehe 30 Aprili, 2022 kwa kuwa kamati ya Ulinzi na Usalama ya Mkoa imejipanga kusimamia utekelezaji katika halmashauri zote saba za mkoa huo na wananchi wamekuwa wakitoa ushirikiano mkubwa

Katibu Mkuu wa Wizara ya Habari, Mawasiliano na Teknolojia ya Habari, Dkt. Jim Yonazi amepongeza ubunifu wa mkoa wa Arusha katika kutekeleza operesheni ya Mfumo huo, aidha ametoa taarifa ya Mfumo wa NaPA unaotumika kuingiza taarifa za makazi na wakazi tayari umewekewa namba ya usaidizi muda wowote inapotokea changamoto

Kwa mujibu wa taarifa iliyowasilishwa kwa Waziri Nape utekelezaji wa Operesheni ya Anwani za Makazi kwa jiji la Arusha ni asilimia 78.7, kwa mchanganuo wa Halmashauri ya Monduli asilimia 45.82, Ngorongoro asilimia 12.51, Arusha DC asilimia 11.21, Meru DC asilimia 4.2, Karatu DC asilimia 2.59 na Longido DC asilimia 39.04.



ANWANI ZA MAKAZI KUTUNZA HISTORIA YA NCHI, WATAKAOHARIBU MIUNDOMBINU KUSHUGHULIKIWA

Waziri wa Habari, Mawasiliano na Teknolojia ya Habari, Mhe. Nape Nnauye ameitoa rai kwa wananchi na viongozi wa mikoa na halmashauri kuweka majina ya barabara na mitaa ambayo yatalinda historia ya nchi

Rai hiyo ameitoa leo tarehe 13 Aprili, 2022 wakati wa ziara yake katika mikoa ya Ruvuma, Mtwara na Lindi kukagua na kuhamasisha kasi ya utekelezaji wa mfumo wa Anwani za Makazi

Amesema kuwa, "Zoezi hili litumike kulinda historia ya nchi yetu, tusiache ikapotea tutumie majina ya viongozi mashuhuri pamoja na watu mashuhuri ili watoto wetu na vizazi vijavyo watakuja kutumia mfumo huu wakiuliza kwanini jina fulani basi wapatiwe historia ya jina husika".

Ameongeza kuwa upo mwongozo mdogo wa uundaji wa majina ya barabara, mitaa na njia unaoruhusu wananchi kukubaliana na kuchagua jina la barabara na mtaa lakini sio vibaya katika baadhi ya maeneo wakitumia majina ya viongozi mashuhuri na watu mashuhuri ili kulinda historia ya nchi

Katika hatua nyingine, Waziri Nape amezielekeza sekretarieti za mikoa kuandaa mifumo madhubuti ya kulinda miundombinu ya Anwani za Makazi dhidi ya uharibifu unaoweza kufanya na watu wasiothamini maendeleo ya nchi

"Tuweke mifumo ya kulinda miundombinu ya

mfumo huu, kwasababu kuna watu wanaweza kuiharibu kwa makusudi kwa kuitoa na kwenda kuiua chuma chakavu, hivyo tuandae mifumo madhubuti ya kuilinda na kuwashughulikia waharibifu wa miundombinu hii", amesisitiza Waziri huyo

Aidha, Waziri Nape ameridhishwa na utekelezaji wa mfumo huo katika mikoa ya Ruvuma, Mtwara na Lindi ikiwa ni mikoa iliyopo katika kumi bora kwenye utekelezaji wa Operesheni hiyo kwa mujibu wa taarifa zinazopatikana katika mfumo wa kidijitali wa Anwani za Makazi

"Sio kwamba hatuziamini sekretarieti za mikoa katika kutekeleza operesheni hii, ukweli ni kuwa mnafanya kazi nzuri lakini Wizara ninayoismamia ina wajibu wa kufika na kukagua namna utekelezaji wa operesheni hii unavyoendelea na vibao vinavyowekwa ili ifikapo mei 22 mwaka huu wa 2022 tuukabidhi mfumo ukiwa salama, kamili na tayari kutumika", amesisitiza Waziri Nape

Naye Mkuu wa Mkoo wa Ruvuma Brigedia Jeneralis Wilbert Ibuge amesema utekelezaji wa operesheni hiyo katika mkoa wake umefikia asilimia 97 na katika mkoa huo zoezi linakwenda vizuri na litakamilika kabla ya tarehe 30 Aprili mwaka huu

Kwa upande wa Brigedia Jeneralis Marco Gagut, Mkuu wa Mkoo wa Mtwara, amesema utambuzi umekwishakamilika kwa asilimia 100, zoezi lilitobaki ni kuingiza taarifa kwenye mfumo wa kidijitali na kusimika nguzo za majina ya barabara

namitaanakablaya tarehe 30mwezi huu
wa Aprili zoezi litakuwa limekamilika

Naye Mkurugenzi wa Mawasiliano
wa Wizara ya Habari, Mawasiliano na
Teknolojia ya Habari, Mhandisi Clarence
Ichwekeleza ametolea ufanuzi kwa
maeneo ambayo yamepimwa lakini
bado hayajaendelezwa kuwa ni lazima
yatapewa namba na taarifa zake
zitaingizwa kwenye mfumo

"Msingiwaanwaniyeyotenikiwanja hata
kama hakijajengwa taarifa zake ni lazima
ziingizwe kwenye mfumo wa utambuzi
wa kidijitali wa Anwani za Makazi ili
hapo baadae patakapoendelezwa
mfumo wa utaonesha nyumba hiyo au
jengo hilo ni namba ngapi", amesitiza
Mhandisi Ichwekeleza



Waziri wa Habari, Mawasiliano na Teknolojia ya Habari, Mhe. Nape Nnauye
(kulia) akibandika jina la barabara ya Chikongola kwenye nguzo kabla ya
kuisimika katika moja ya barabara za mkoa wa Mtwara.





MAJALIWA AZINDUA VITUO VINNE VYA KURUSHA MATANGAZO YA REDIO YA TBC TAIFA NA TBC FM

Waziri Mkuu wa Jamhuri ya Muungano wa Tanzania Mhe, Kassim Majaliwa Majaliwa amezindua vituo vinne vya kuongeza usikivu wa redio za TBC Taifa na TBC FM vilivyopo Ruangwa (Lindi), Ludewa (Njombe), Mlimba (Morogoro) na Ngara (Kagera) ambapo tukio la uzinduzi limefanyika Ruangwa mkoani Lindi

Akizungumza katika uzinduzi huo Aprili 14, 2022, Mhe. Majaliwa amevitaka vyombo vya habari nchini kuendelea kuuhabarisha umma kwa kuweka mbele uzalendo, utaifa na kujali maslahi ya nchi kwa kulisemea Taifa la Tanzania ndani na nje ya nchi

Waziri Mkuu Majaliwa ametoa maelekezo kwa wanahabari nchini kufanya kazi zao za kuuhabarisha umma kwa weledi mkubwa kwa kufanya utafiti wa kina wa habari wanazotitoa ili kuepeka utoaji wa taarifa chonganishi au za kuidharaurisha nchi kwani kwa kufanya hivyo ni kuidharaurisha tasnia ya habari

Aidha, ameielekeza Wizara inasosimamia Sekta ya Habari nchini kuhakikisha maslahi na mikataba ya

wanahabari kutoka kwa wamiliki wa vyombo vya habari nchini, kuendelea kusimamia mitandao ya kijamii pamoja na kuhakikisha uhuru wa wanahabari unalindwa kwa kuzingatia maadili na miongozo ya tasnia ya habari

Kwa upande wa Waziri wa Habari, Mawasiliano na Teknolojia ya Habari, Mhe. Nape Nnauye amezipongeza taasisi zilizo chini ya Wizara yake za Mfuko wa Mawasiliano kwa Wote (UCSAF) kwa kutoa ruzuku ya shilingi Bilioni 3.1 kwa Shirika la Utangazaji Tanzania (TBC) ikiwa ni utekelezaji wa mpango wa tatu wa kuongeza usikivu wa TBC Taifa na TBC FM katika maeneo mbalimbali nchini

Waziri Nape amezipongeza taasisi za UCSAF na TBC kwa ushirikiano mzuri katika kuhakikisha umma wa watanzania unapata habari za ukweli na uhakika, lakini pia ametumia fursa hiyo kulipongeza Bunge la Tanzania kwa kurudisha Bunge mubashara ambapo kwa kufanya hivyo ni hatua kubwa ya kulinda uhuru wa vyombo vya habari nchini

Kwa upande wa Mtendaji Mkuu wa UCSAF, Justina Mashiba amesema mfuko huo umefadhili miradi ya kuongeza usikivu katika maeneo 13 nchini na kati ya hivyo miradi minne ndio imezinduliwa na mingine inaendelea kutekelezwa lengo likiwa ni kuhakikisha watanzania wote wanapata taarifa kupitia radio za ndani ya nchi

Naye Mkurugenzi Mkuu wa TBC, Dkt. Ayub Rioba amesema kuwa kuna miradi mingi inaendelea ya kuongeza usikivu ambayo ikikamilika usikivu utakuwa kwa asilimia 83, kutoka asilimia 50 ya mwaka 2016, aidha, kwa sasa baada ya uzinduzi wa vituo hivyo nne usikivu wa TBC kwa sasa ni asilimia 70.



Muonekano wa kituo cha kuongeza usikivu wa radio ya TBC Taifa na TBC FM kilichopo Ruangwa Lindi, ikiwa ni moja ya vituo vinne kama hicho vilivyozinduliwa na Waziri Mkuu wa Jamhuri ya Muungano wa Tanzania, Mhe. Kassim Majaliwa Majaliwa katika hafla fupi iliyofanyika Ruangwa mkoa wa Lindi



Waziri Mkuu wa Jamhuri ya Muungano wa Tanzania, Mhe. Kassim Majaliwa Majaliwa akisalimia na Mhe. Nape Nnaye, Waziri wa Habari, Mawasiliano na Teknolojia ya Habari wakati wa hafla ya kuzindua vituo vinne vya kuongeza usikivu wa radio ya TBC Taifa na TBC FM vya Ruagwa, Ludewa, Mlimba na Ngara iliyofanyika Ruangwa mkoa wa Lindi



Waziri Mkuu wa Jamhuri ya Muungano wa Tanzania, Mhe. Kassim Majaliwa Majaliwa akizungumza baada ya kuzindua kituo cha kuongeza usikivu wa radio ya TBC Taifa na TBC FM Ruagwa Mkoani Lindi kikiwakilisha uzinduzi wa vituo vingine vitatu vya Ludewa, Mlimba na Ngara



Waziri wa Habari, Mawasiliano na Teknolojia ya Habari, Mhe. Nape Nnauye akiagana na Naibu Katibu Mkuu wa Wizara hiyo, Mohammed Khamis Abdulla baada ya uzinduzi wa vituo vinne vya kuongeza usikivu wa radio ya TBC Taifa na TBC FM vya Ruagwa, Ludewa, Mlimba na Ngara uliofanywa na Waziri Mkuu Mhe. Kassim Majaliwa Majaliwa katika Wilaya ya Ruangwa mkoa wa Lindi



Naibu Katibu Mkuu wa Wizara ya Habari, Mawasiliano na Teknolojia ya Habari, Mohammed Khamis Abdulla akiteta jambon a Mwenyekiti wa Kamati ya Kudumu ya Bunge ya Miundombinu, Mhe. Selemani Kakoso katika hafla ya uzinduzi wa vituo vinne vya kuongeza usikivu wa radio ya TBC Taifa na TBC FM vya Ruagwa, Ludewa, Mlimba na Ngara uliofanywa na Waziri Mkuu Mhe. Kassim Majaliwa Majaliwa katika Wilaya ya Ruangwa mkoa wa Lindi



Wizara ya Habari, Mawasiliano na Teknolojia ya Habari

S.L.P. 677,40470 Dodoma, Tanzania

Barua pepe: ps@mawasiliano.go.tz

Tovuti: www.mawasiliano.go.tz

